

嘉慶廬州府志

廬州府志卷二十九

名將下

張德勝

汪興祖

楊璟

廖永忠

趙庸

劉真

吳復

葉昇

陳開

鄭用

鄭亨

瞿通

周顯

徐用

高顯

馬雲

陳文

袁義

花茂

郭彥仁

朱文

汪源

施質

俞廷玉

俞通海

弟通源

甯仲英

劉友仁

胡通

趙馘

王珪

鄭祥

李榮

左君弼

許榮

趙雄

金朝興

楊義

楊興

唐賀張旭楊廣曹貴

高謙倪旺金斗輔陳奉

成武周通宋允丁襄

吳城吳徐

尹貴陳仲良傳錄楊重三蕭春

孫世陳清王玉王瑛

王雄韋權戈預戈戡宋展

宋瑄宋璠

宋瑛宋傑徐忠郭亮張禮

李讓孫史昭陳圭子王讓鄭能

董金鳳

廬州府志卷二十九

賜進士出身廬州府知府溫陵張祥雲主修
名將下

明

張德勝字仁輔合肥人才略雄邁與俞通海等以舟師自巢
來歸從渡江克采石太平陳瑊先來攻與湯和等破禽之
授太平興國翼總管破蠻子海牙水寨禽陳兆先下築慶
克鎮江授秦淮翼元帥取常州擢樞密院判克寧國收長
槍兵下太湖略馬騷山攻宜興取馬馱沙及石牌寨進禽
樞密院事趙普勝陷池州德勝往援弗及還從徐達拔宜
興復同通海復池州走普勝將胡總管追敗之青山遂北

至潛山陳友諒犯龍江德勝總舟師迎戰友諒軍大敗與諸將追及之慈湖縱火焚其舟至采石大戰沒於陣追封蔡國公諡忠毅肖像功臣廟侑享太廟子宜幼養子興祖嗣職興祖巢人木汪姓旣嗣職從破安慶克江州拔蘄黃取南昌從援安豐大敗張士誠兵鄱陽之戰與廖永忠等以六舟深入又邀擊友諒於涇江口功最擢湖廣行省叅政從平武昌遂克廬州略地至通州而還進大都督府僉事從徐達取淮東下浙西進同知大都督府事大軍北征別將衛軍由徐州克沂青東平乘勝至東阿降元叅政陳璧及所部五萬餘人衍聖公希學仲曲阜知縣希舉鄒縣主簿孟思諒等迎謁於軍門興祖禮之充東州縣聞風皆

下遂取濟寧濟南洪武元年與大將軍會師德州帥舟師
克元都徇下永平西取大同時德勝子宣已長命爲宣武
衛指揮同知而興祖復姓爲汪三年進克武朔二州獲元
知院馬廣等至大同北口大敗元兵獲擴廓弟金剛奴等
四百餘人四年從前將軍傅友德合兵伐蜀克階文乘勝
至五里關中飛石死蜀平詔優賞其子追封東勝侯子世
券興祖子幼命與宣同居以疾卒爵除

明史列傳

楊璟合肥人本儒家子以管軍萬戶從太祖下集慶進總管
下常州進親軍副都指揮使從下婺州遷樞密院判官再
從伐漢以功擢湖廣行省叅政進攻湖廣南蠻寇復以招討
功遷行省平章政事將武昌諸衛軍取廣西洪武元年春

進攻永州守將鄧祖勝迎戰敗歛兵固守璟進圍之久不下令裨將分營諸門築壘困之造浮橋西江上急攻之祖勝力盡仰藥死遂克永州進攻靖江不下璟謂諸將曰彼所恃西濠水耳決其隄岸破之必矣乃遣指揮邱廣攻牐口關殺守隄兵盡泚濠水築土隄五道傅於城二月克之執平章也兒吉尼先是張彬攻南關爲守城者所誑怒欲屠其民璟甫入立下令禁止之民乃安復移師徇郴州降兩江土官黃英岑伯顏等而永忠亦定南寧象州廣西悉平未幾詔璟往使於夏是時夏主昇幼母彭及諸大臣用事璟數諭昇以禍福俾從入覲諸大臣皆持不可昇亦莫能從璟還再以書諭昇終不聽踰二年而夏亡璟遷湖廣

行省平章三年大封功臣封環營陽侯祿千五百石子世
券五年充副將軍從鄧愈討定辰沅蠻寇再從大將軍徐
達鎮北平練兵遠東十五年八月卒追封芮國公諡武信

子通嗣

明史列傳

廖永忠巢人楚國公安弟也從永安迎太祖於巢湖年最
少太祖曰汝亦欲富貴乎永忠曰獲事明主掃除寇亂垂
名竹帛是所願耳太祖嘉焉副永安將水軍渡江拔采石
太平擒陳瑒先破蠻子海牙及陳兆先定集慶克鎮江常
州池州討江陰海寇皆有功永安陷於吳以永忠襲兄職
爲樞密僉院總其軍從攻江州州城臨江守備甚固永忠
度城高下造橋於船尾名曰天橋以船乘風倒行橋傳於

城遂克之進中書省右丞從下南昌援安豐戰鄱陽復與
俞通海等以七舟載葦荻乘風縱火焚敵樓船數百又以
六舟深入搏戰復旋繞而出又邀擊之涇江口友諒死從
征陳理理降還京太祖以漆牌書功超羣將知邁雄師八
字賜之懸於門已從徐達克淮東諸郡從伐士誠取德清
進克平江會湯和討降方國珍進克福州定閩中諸郡至
延平破執陳友定尋拜征南將軍由海道取廣東至廣州
降廬左丞禽海寇邵宗恩數其殘暴斬之廣人大悅馳諭
九真日南朱厓儋耳三十餘城皆納印請吏進取廣西至
梧州降元達魯花赤拜任潯柳諸路皆下引兵克南寧降
象州兩廣悉平明年九月還京師帝命太子帥百官迎勞

於龍江入見仍命太子送還第三年從大將軍徐達北征克蔡罕臘兒還封德慶侯食祿一千五百石子世券明年以征西副將軍從湯和帥舟師伐蜀至瞿塘關山峻水急蜀人設鐵鎖橫據關口舟不得進永忠密遣數百人持糗糧水筒舁小舟險山渡關出其上流蜀山多草木令將士皆衣青蓑衣魚貫走崖石間度已至帥精銳出墨葉渡夜五鼓分兩軍攻其水陸寨水軍皆以鐵裹船頭置火器而前黎明蜀人始覺盡銳來拒永忠已破其六寨會將士舁舟出江者一時並發上下夾攻大破之焚三橋斷橫江鐵索禽同僉蔣達等八十餘人遂入夔府明日和始至乃與和分道進期會於重慶永忠帥舟師直擣重慶次銅鑼

峽蜀主明昇請降蜀地悉平帝製平蜀文旌其功有傅一
廖二之語褒賚甚厚八年三月坐僭用龍鳳諸不法事賜
死子權十三年嗣侯從傅友德征雲南守畢節及瀘州召
還十七年李子鏞傳見忠節初廖永忠等之歸太祖也趙庸
兄弟亦俱降庸廬州人兄仲中累功爲行都密院僉事守
安慶陳友諒陷安慶仲中棄城走大龍誅仲中而以其官
授庸從復安慶徇江西諸路進參知政事從戰康郎山與
俞通海廖永忠等以六舟深入敗敵平武昌克廬州援安
豐皆有功大軍取滙東庸與華高帥舟師克海安泰州進
圍平江吳平擢中書左丞從大將軍取山東洪武元年命
兼太子副詹事分兵渡河徇下河北州縣進克河間又從

大軍克太原下關陝從常遇春北追元帝師還遇春卒命
庸爲副將軍同李文忠攻慶陽行至太原元兵攻大同急
文忠與庸謀以便宜援大同再敗元兵於馬邑禽其將脫
列伯三年復從文忠北伐克應昌師還論功最封南雄侯
食祿一千五百石子世券十四年閩粵盜起命庸討之踰
年悉平又平廣東盜號鏟平王者還賜綵幣上尊良馬其
冬出理山西軍務巡撫北邊二十年以左叅將從傅友德
討納哈出二十三年以左副將軍從燕王出古北口降乃
兒不花還坐胡惟庸黨死爵除

明史列傳

劉眞合肥人從太祖累官左軍都督充大寧總兵官靖難兵
起眞及陳亨十萬引大寧軍出松亭關營沙河欲復遵化

亨陰結成祖入關眞衣負勅印浮海而南時建文帝聞北
平諸將皆降已籍眞家屬下獄俄眞由海道出福建還應
天詔釋之靖難後官左都督鎮遼東恆懷愧憤竟以憂卒
康熙志

吳復字自起合肥人少負勇略元末集衆保鄉里歸太祖於
濠從克泗滁和采石太平累官萬戶從徐達攻鎮江克常
州進統軍元帥援安豐平武昌克廬州下漢沔荆諸郡縣
授鎮武衛指揮同知守沔陽從常遇春下襄陽別將破安
陸克汝州魯山洪武元年授懷遠將軍安陸衛指揮使平
鄖均房竹諸山寨三年從大將軍征陝西明年從傅友德
平蜀又明年從鄧愈平九溪辰州諸蠻進大都督府僉事

授世襲指揮使十一年從沐英再征西番論功封安陸侯
食祿二千石十四年從傅友德征雲南充總兵官勦捕諸
蠻遂取廣西十六年克墨定苗至吉刺堡築安莊新城平
七百房諸寨轉餉盤江金瘡發卒於普定追封黔國公諡
威毅加祿五百石予世券復臨陣奮發衝犯矢石體無完
膚平居恂恂口不言征伐事在普定買妾楊氏年十七復
死視殮畢沐浴更衣自經死封貞烈淑人子傑嗣屢出山
陝河南北平練兵從征建文中戰白溝河失律謫南寧衛
指揮使宏治十八年錄復子孫世職千戶

明史列傳

葉昇合肥人左君弼據廬昇自拔來歸洪武三年論功僉大
都督府事明年從湯和以舟師取蜀越二年出爲都指揮

使鎮西安討平慶陽叛寇十二年復僉大都督府事西番
叛與都督王弼征之降乞失迦平其部落復討平延安伯
顏帖木兒禽洮州番酋論功封靖寧侯歲祿二千石世指
揮使鎮遼東修海益復三城在鎮六年邊備修舉外寇不
敢犯發高麗賂遺帝屢賜敕與唐勝宗同褒二十年同普
定侯陳桓總制諸軍於雲南定邊姚安立營屯田經理畢
節衛昇凡三平叛蠻再出練兵甘肅河南坐交通胡惟庸

事死

明史列傳

陳聞合胞人元末爲義兵千戶太祖克太平聞率衆來歸充
管軍千戶從征江南浙江武昌前後皆有功自楚而蜀而
滇滅賊平蠻俱奉調以偏師奏績官至成都右衛指揮同

知予世襲子瑄

康熙志

鄭用合肥人自和州應募謹事太祖積功授平陽右衛百戶

陞大興衛副千戶亨

康熙志

鄭亨父用爲大興左衛副千戶請老亨嗣職洪武二十五年
應募持檄諭韃靼至斡難河還遷密雲衛指揮僉事燕師
起以所部降歷遷中府左都督封武安侯祿千五百石子
世券畱守北京永樂元年充總兵官備宣府亨至邊度宣
府萬全懷來形便每數堡擇一堡可容數堡軍馬者爲高
城深池浚井蓄水謹瞭望寇至夜舉火晝鳴礮併力堅守
規畫周詳後其能易成祖凡五出塞亨皆在行間洪熙初
鎮大同墾田積穀邊備完固自是大同希寇患宣德元年

召掌行後府事已仍鎮大同轉餉宣府招降迤北部長四十九人請於朝厚撫之歸附者相屬九年二月卒於鎮亨嚴肅重厚善撫士卒恥掎克在大同時鎮守中官撓軍政亨裁之以理其人不悅然其卒也深悼惜之贈漳國公諡忠毅妾張氏自經以殉贈淑人子能嗣爵

明史列傳

瞿通合肥人太祖駐師和陽從諸將來歸積功至鳳陽指揮使陞大都督府僉事致仕贈右都督子能

康熙志

周顯合肥人精悍有膽氣驍勇過人自黃山來附東渡江充帶刀先鋒侍左右定江浙戰鄱陽湖皆有功從常遇春李文忠北伐收應昌紅螺山諸處授驍騎前衛指揮使再從李文忠進兵阿魯渾河戰歿追封汝南郡伯子巖有父風

徐用合肥人元季守宣城率眾來附以功歷副千戶自陳老疾以子忠代從征運餉勞績屢著陞濟陽衛世襲指揮僉

事鎮開平封永康侯

康熙志

高顯梁縣人太祖駐師太平顯來附下江浙楚豫入元都平關陝顯皆從焉歷指揮僉事三年分封諸王以爲燕府左副兼大興右衛指揮使十一年從征松潘等州松州旣平城其地請立軍衛置松州衛指揮使司設官戍守陞大都督僉事卒追封汝陰侯諡武肅

明隆慶志

馬雲合肥人隸長槍軍謝再興爲千戶再興叛雲自拔歸數從征積功授指揮僉事洪武四年偕葉旺鎮遼東初元主

北走其遼陽行省叅政劉益屯蓋州與平章高家奴相爲聲援保金復等州帝遣斷事黃儔齎詔諭益益率眾來歸乃立遼陽指揮使司以益爲指揮同知未幾元平章洪保保馬彥翬謀殺益右丞張良佐左丞商嵩擒彥翬殺之保保挾儔走納哈出營良佐以狀聞且言遼東肘腋皆敵境今保保逃往斃必起乞畱斷事吳立鎮撫軍民帝命立良佐嵩俱爲蓋州衛指揮僉事旣念遼陽重地復以旺及雲爲都指揮使往鎮之未幾納哈出果以寇至見備禦嚴不敢攻越蓋至金州乃刺吾者敵驍將也率精騎挑戰城南中杖弩爲明兵所獲敵大沮引退不敢由故道從蓋城南十里沿柞河道旺先以兵扼柞河自蓮雲島至窟駝寨十

餘里綠河壘冰爲牆沃以水經宿凝沍如城布釘版沙中
旁設坑穽伏兵以伺雲等建大旗城中嚴兵不動寂若無
人已寇至城南伏四起納哈出倉皇趨連雲島遇冰城旁
走悉陷於穽遂大潰雲自城中出合兵追擊納哈出僅以
身免第功進都督僉事十二年命雲征大寧捷聞受賞召
還京後數年卒雲之鎮遼也翦荆棘立軍府撫輯軍民墾
田萬餘頃遂爲永利遠人德之嘉靖初命有司立祠春秋

祀之

明史葉旺傳

陳文合肥人少孤奉母至孝元季挈家歸以功積官都督僉
事卒追封東海侯諡孝勇明臣得諡孝者又一人而已

明

史蔡遷傳

袁義廬江人本張姓德勝族弟也初爲雙刀趙總管德勝戰死始來附爲帳前親軍元帥賜姓名數從征伐積功爲典武衛指揮僉事從大將軍北征敗元平章俺普達等於通州走賀宗哲魯同於澤潞功最復從定陝西與諸將合攻慶陽張良臣兵驟薄義營義堅壁不爲動俟其懈力擊破之南取興元進本衛同知調羽林衛移鎮遼東已從沐英征雲南畱鎮楚雄蠻人屢叛義積糧高壘且守且戰以功遷楚雄衛指揮使嘗入朝帝厚加慰勞以其老命醫爲染髮鬚俾還任以威遠人歷二十年墾田築堰治城郭橋梁規畫甚備軍民德之建文元年徵還爲右軍都督府僉事進同知

明史甯正傳

花茂巢縣人初從陳埜先已而來歸積功授武昌衛副千戶
征西蜀進神策衛指揮僉事調廣州左衛平陽春清遠英
德翁源博羅諸山寨叛蠻及東莞龍川諸縣亂民進指揮
同知再遷都指揮同知世襲指揮使上言廣東南邊大海
姦宄出沒東莞笏岡諸縣逋逃蝥戶附居海島遇官軍則
詭稱捕魚遇番賊則同爲寇盜飄忽不常難於訊詰不若
藉以爲兵庶便約束又請設沿海依山廣海碣石神電等
二十四衛所築城浚池收集海島隱料無籍等軍仍於山
海要害地立堡屯軍以備不虞皆報可進都指揮使卒賜
葬安德門長子榮襲職次子英果毅有父風亦以軍功爲
廣東都指揮使有聲

明史列傳

郭彥仁無爲人少讀書有勇略尤長吏事款附後以忠謹見
委任李文忠用兵湖西彥仁爲叅謀多所裨益時胡大海
與李文忠有隙太祖命彥仁調和之以功賜金幣金華苗
將蔣英等作亂戕叅政胡大海彥仁率兵擊走之入金華
撫其民時處州苗將李祐之等亦殺守將耿再成彥仁復
領兵屯縉雲遏其侵軼後援新城取杭州皆有勞授嚴州
知府

康熙志

朱文無爲人從定金陵及江南諸郡由帥職累官指揮守太
倉威望甚著從平湖西積功陞後軍都督僉事

明隆慶志

汪源無爲人幼有膽力驍健善戰充水軍前翼頭目從元帥
李志高指揮秦明佑修築本州城池又累從諸大將征伐

身先士卒前後斬獲無算陞指揮僉事孫誌永樂初以功

改潞州衛指揮使

康熙志

施質無爲人元末爲義兵隊長有寇至泥汭聲言攻城質率衆往禦悉擒斬之從土人趙總管款附授百戶改西安護衛從征沙漠予世職時北征諸將多失機獨質身先士卒以所部全歸蒙特獎洪武三十年改貴州安莊衛百戶

康熙

熙志

俞廷玉濠州人遷居巢江淮兵擾與子通海通源通淵結縣人廖永安等屯巢湖爲水寨以捍寇亂數爲廬州左君弼所窘聞明太祖駐師和陽乃相率持書乞援太祖親至巢湖拔其軍出黃墩兵威自此益盛廷玉從渡江積功至樞

密僉事總舟師攻安慶沒於陣贈龍虎將軍上護國同知

樞密院事追封河間郡公

康熙志

俞通海字碧泉爲人沈毅治軍嚴而有恩士樂爲用巢湖諸將皆長於水戰而通海爲最從破海牙諸水寨授萬戶從渡江克采石取太平徇下諸屬縣進破陳兆先取集慶路從湯和拔鎮江遷秦淮翼元帥借諸將取丹陽合壇常州遷行樞密院判官從克寧國下水陽以舟師略太湖降張士誠守將於馬蹟山艤舟胥口呂珍兵暴至通海身先疾鬪矢中右目不能戰命帳下士被己甲督戰敵以爲遁海也不敢逼徐解去陳友諒圍南昌從太祖擊之遇於康郎山舟小不能仰攻力戰幾不支通海乘風縱火焚其舟二

十餘敵少挫明日復戰偕廖永忠等以七舟置火藥焚敵舟數百踰二日復以六舟深入敵連大艦力拒太祖登舵樓望久之無所見意已沒有頃六舟繞敵艦出飄緲若遊龍軍士譁譟勇氣百倍戰益力友諒兵大敗師次左蠡通海進曰湖有淺舟難回旋莫若入江據敵上流彼舟入卽成禽矣遂移師出湖水陸結柵友諒食盡引兵突走竟敗死是役也通海功最多明年從平武昌拜中書省平章政事進擢江淮行中書省事鎮廬州從徐達圍平江戰滅渡橋擣桃花塢中流矢剝甚歸金陵太祖幸其第問曰平章知予來問疾乎通海不能語太祖揮涕而出翼日卒年三十八追封豫國公侑享太廟肖像功臣廟洪武三年改封

號國公諡忠烈通海無子弟通源嗣其官通源字百川從大將軍征中原定河中渡河克鹿臺取鳳翔鞏昌涇州守開城克慶陽征定西克興元皆先登洪武三年封南安侯歲祿千五百石子世券四年從廖永忠伐蜀又從徐達出塞撫甘肅有功又攻雲南征廣南蠻俘斬數萬二十二年詔還鄉賜鈔五萬置第於巢未行卒逾年追論胡惟庸黨爵除淵以父兄故充叅侍舍人從征積功授都督僉事通源既坐黨太祖念廷玉通海功封越愷侯歲祿二千五百石子世券明年坐累失侯遣還里建文元年詔復爵隨大軍征燕戰歿於白溝河次子靖嗣官

明史列傳

甯仲英合肥人累以軍功陞前軍都督僉事子福嗣以功封

建平伯 明隆慶志

劉友仁合肥人弟謙元末各起兵保鄉里後歸明太祖隸謝元帥麾下從胡大海取徽寧友仁授中軍左元帥援池州與雙刀趙戰歿功臣廟謙襲兄職從征江西洪武元年扈車駕幸北京以功多調山陝累陞都督封流伯永樂間率上聞輟朝遣祭 康熙志

胡通合肥人至元乙未明太祖駐師和陽通挺身來附從渡江取江南浙江江西下武昌會征南將軍廖永忠等征廣東取肇慶等郡邑復會永忠於廣州降元守將盧左丞累官指揮使陞前軍都督僉事 康熙志

趙誠廬州人乙未春與俞通海等同時納款從征宣城寧國

長槍諸將乘勢下水陽克大浦口常州平陞行樞密院判
官以舟師略太湖馬蹟山降張士誠將王貴鈕津經洞庭
山敗呂珍於施口復從攻趙普勝於樅陽拔柵江營復池
州後征安慶九江等處皆有功

康熙志

王珪合肥人元末募集鄉民守廬州自稱萬戶鎮南巢尋率
眾歸太祖從征渡江克復太平仍命爲萬戶守之後下江
南諸州邑積功授指揮使陞右軍都督僉事

明隆慶志

鄧祥合肥人明初從太祖定四方以功歷官指揮僉事洪武
十四年從征雲南克普勝定普安曲靖善闡十五年克大
理後陞本衛指揮時西平侯沐英鎮雲南遇有征伐率以
命祥多見克捷二十年春浪穹逋寇扇羣蠻爲亂鶴慶劍

川輒相爲應祥率兵乘其未集掩而殲之諸蠻讐服在鎮
十餘年善馭下恩威兼濟軍民懷之

明隆慶志

李榮廬州梁縣人從太祖克滁和定江左北伐中原皆有勞
績繇總旗授永平衛千戶陞廣武衛指揮僉事洪武五年
從李文忠繇東路出居庸擣應昌取和林渡驢胸河兼程
而進深入土刺與蠻子哈刺章戰至渾河文忠馬中流矢
下馬持短兵接戰榮卽以所乘馬授文忠文忠得馬氣益
厲遂敗敵俘獲以萬計是役也榮翼衛之功居多六年復
從北征有功

明隆慶志

左君弼廬州人元季據廬州張士誠將呂珍寇安豐君弼助
之太祖帥諸將擊珍敗走遂攻廬州君弼棄城走汴元將

李克彝使守陳州吳元年太祖遣使以書招諭君弼得書
猶豫不能決太祖乃歸其母於陳州君弼感泣始納款命
爲廣西指揮僉事君弼自劾從征克捷二年左江上思州
蠻賊黃英傑與弟英覽聚眾萬餘寇鬱林命君弼爲副總
兵討之英傑陣死英覽就俘自是兩江獍會膽落

明隆慶志

許榮字榮卿舒城人少長雄偉汝穎盜廷及江泔榮立屯烏
沙河聚保鄉里迺盜陷舒城邑人奉榮爲主盜相戒曰此
烏沙許帥也勿犯其境榮因孤立求援於多寶假統軍元
帥之號鎮舒有惠政甲午青巾掠大河以南惟不敢入榮
境雙刀趙陷廬州分兵四出榮堅不動按地形修七門諸
堰俱灌溉之利教民農桑民賴以寧竹真據安豐陷六安

數乘勝來侵力戰卻之加驃騎上將軍同知樞密甲辰廬
州歸明榮卽日誓衆封府庫籍軍民之數表上之方太祖
徇江北榮遣人餽饗給衣裘拜錫衣卣望之賜入覲後恩
眷彌篤命以前職鎮守明年改廬州同知

康熙志

趙雄巢縣人自巢湖歸附太祖從平中原功多封南雄侯坐

藍玉黨國除

康熙志

金朝興巢縣人淮西亂聚衆結寨自保俞通海等旣歸太祖
朝興亦帥衆來附從渡江征伐皆預有功洪武三年論功
爲都督僉事兼秦王左相朝興沈勇有智略所至以偏師
取勝雖未爲大帥而功出諸將上十一年從沐英西征收
納鄰七站地論功封宣德侯祿二千石世襲指揮使卒追

封沂國公諡武毅十七年論平雲南功改錫世侯參增祿
五百石長子鎮嗣封二十三年追坐朝典胡惟庸黨降鎮
平壩衛指揮使從征有功進都指揮使其後世襲衛指揮
使嘉靖元年命立傅友德梅思祖及朝興廟於雲南額曰
報功 明史列傳

楊義巢縣人從元帥俞昭屢立戰功官遼東都指揮僉事調
福建 明隆慶志

楊興巢縣人初事雙刀趙以智勇聞歸太祖從破安慶殲陳
友諒滅吳定中原皆有功授指揮僉事討廣西叛蠻克郎
八保及三千八萬向家等砦招降土官王萬全等陞貴州
衛指揮子世襲 明隆慶志

唐賀巢縣人性勇毅才識卓偉歸太祖積有戰功擢湖州衛

指揮僉事階明威將軍

明隆慶志

張旭巢縣人從太祖渡江略定江浙楚地以功僉衢州衛指

揮事予世職

康熙志

楊廣巢縣人初事雙刀趙丁酉自宣州歸附太祖授左翼元

帥副使管軍千戶屢立戰功其後從西平侯沐英征洮州

中矢傷左脇卒賜葬橐皋令詞臣撰碑銘以昭勳節

康熙志

曹貴巢縣人本富家兒歸太祖積功授指揮僉事洪武十九

年乞歸子儼襲未幾復以爲定海衛指揮授廣威將軍貴

性忠亮在定海時海賊竊發軍中輒造銅牌爲小校所訴

上曰軍事不可緩也諭其人而遣之寵賚不一賜號釋口

復許服金龍與公侯伍二十三年詔優老於巢次子儀有
隱德號梅巖居士孫亨安邑令曾孫廣虞城教諭元孫環
領鄉荐琥登進士巢邑武勳惟貴子孫以文顯云

康熙志

高謙巢縣人甲午偕弟諒歸太祖以智勇選居前却戰輒有
功累陞指揮同知奏言家屬甚眾非祿養所能給願分撥
回鄉賜水陽田地一千七百畝贍其家子世職

康熙志

倪旺巢縣人歸太祖以戰功累陞定遼中衛指揮僉事卒子

昶襲孫璘再襲

明隆慶志

金斗輔巢縣人乙未從太祖征討以功授大都督府僉事

明

隆慶志

陳奉巢縣人與俞廖其事授廣洋衛指揮病故歸葬東日子

欽欽子敬世襲成化間有庶支在巢者曰陳能

康熙志

成武巢縣人至正丙申事蠻子海牙充水砦頭目及敗降隨
廖永忠立功授千戶卒子凱襲以功陞杭州前衛指揮凱

卒子綱嗣職

康熙志

周通巢縣人父周興歸太祖敘功世襲六安衛指揮使

康熙志

宋允字執中巢縣人元季集義兵衛鄉邑衆推爲千夫長後
從俞通海立功陞鎮江衛指揮僉事調金吾衛

康熙志

丁襄巢縣人從太祖戰鄱陽有功除副千戶又吳斌吳徐與
襄同時百戶竝世襲

康熙志

尹貴巢縣人太祖時爲列校從征陞百戶戰白溝河陣亡子

整襲

康熙志

陳仲良巢縣人自采石從征授昭信校尉復州衛流官百戶
同時有傅鑑者官鐵嶺衛都指揮使

康熙志

楊重三廬州人從明祖渡江累立戰功授成都中衛指揮同
知長子宗當世官以讓其弟興入蜀有還遺金事見佚事

志 康熙志

蕭春合肥人洪武初從征以北伐功授延安衛指揮子世襲
其後有如薰官寧固薊保四鎮挂印總兵官如蘭南京後
軍都督府同知春歿賜葬本鄉之官廳卽舊居處也後太
守張邦政爲立碑記其始末子姓世居其地

康熙志

孫世巢縣人以隨征功累中軍都督府僉事卒上輟朝遣官
致祭追封富春侯

康熙志

陳清巢縣人從和陽入金陵取淮浙湖廣江右皆有功領舟師捕倭寇殺獲甚衆僉中軍都督府事以年老俾食祿致仕卒追封合浦侯諡崇武

康熙志

王玉梁縣人歲壬辰太祖起兵於濠玉與弟瑛來歸置衛帳下玉剛勇有謀繆家山寨兵勁悍首攻夷之再蹂黃墩蕩湖口賊莫敢當其鋒授千夫長取滁和敗青山兵從擊雞籠山羣盜以功授萬夫長從渡江奪采石克太平東收溧陽溧水攻宣州克臺城復南徐陞右副元帥從徐達攻常州張士誠弟士德來援玉遣男虎子追擒之陳友諒僞平章李明道領兵五萬圍廣信玉手俘明道送京師太祖因授明道官命爲鄉導以取江西玉之功於是爲大

明隆慶

志

王瑛字君寶王之弟王每戰瑛常與左右相爲犄角王卒廷議以瑛久在兵間聲望素著命統其衆張士誠侵新城瑛舞槩衝其中堅賊大敗受上賞從攻浦城大小之戰數十斬首二千餘級虜將校五十餘人降卒八百餘人已從李平章取桐廬富陽餘杭遂入錢塘陞指揮副使又從胡左丞捕寇海中殲之洪武二年加明威將軍從李平章北行行至通州病歸歿於毘陵年三十五歲上聞而悼之賜衣廩土田存恤其家

明隆慶志

王雄合肥人從太祖征伐立戰勳授指揮累陞河南都司都指揮使階驃騎將軍

明隆慶志

韋權合肥人元季從軍淮西爲列校太祖舉兵權來歸從

江所向有功由指揮陞都督僉事

明隆慶志

戈預梁縣人歲乙未從太祖渡江積有功烈由指揮歷陞中軍都督府都督坐謫行伍子戡洪武三十五年有功陞指揮使以其官遜于兄弼任廬州衛後調濟寧右衛弼以疾請歸職於戡陞廣東都督指揮僉事

明隆慶志

宋晟字景陽定遠人

崇禎志云世居合肥

父朝用兄國興竝從太祖渡

江皆積功至元帥攻集慶國興戰歿晟嗣其職既而朝用請老晟方從鄧愈克徽州召還襲父官累進都指揮同知洪武十二年坐法降涼州衛指揮使十七年討西番叛酋俘獲萬八千人還復爲都指揮進右軍都督僉事仍鎮涼州二十四年充總兵官與都督劉眞討哈梅里其地去肅

州千餘里晟令軍中多具糧糗倍道疾馳乘夜至城下質明金鼓聲震地闔城股栗遂克之禽其王子列兒怯帖木兒及僞國公以下三十餘人收其部落輜重以歸自是番戎懾服兵威極於西域明年從藍玉征罕東還調中軍都督僉事二十八年從總兵官周興出開原至忽刺江部長西陽哈道追至甫答迷城俘人畜而還明年拜征南右副將軍討廣西嶢嶺諸寨苗斬七千餘人又明年總羽林八衛兵討平五開龍里苗三十一年出鎮開平從燕王出塞還城萬全諸衛成祖卽位入朝進後軍左都督拜平羌將軍遣還鎮永樂三年招降把都帖木兒倫都兒灰等部落五千人封西寧侯祿千一百石世指揮使晟凡四鎮涼州

前後二十餘年威信著絕域帝以晟舊臣大有將材專任以邊事所奏請輒報可御史劾晟自專帝曰任人不專則不能成功況大將統制一邊寧能盡拘文法卽敕晟以便宜從事會病卒晟三子長瑄建文中爲府軍右衛指揮使戰靈璧先登斬數級力鬪死瑄弟琥尙成祖女安成公主得嗣侯子世券八年佩前將軍印鎮甘肅與李彬捕叛酋老的罕俘斬甚衆洪熙元年坐不敬奪爵弟瑛嗣瑛尙成寧公主正統中歷掌左軍前府事也先入寇瑛戰死贈鄆國公諡忠順子傑嗣景泰中典禁兵宿衛以謹慎稱卒子誠嗣署右府事復佩平羌將軍印鎮甘肅誠有材武嘗出獵至涼州遇寇掠牛馬北去誠三矢殪三人寇驚散盡驅

所掠還九傳至孫裕德死流寇難

明史列傳

徐忠合肥人襲父爵爲河南衛副千戶累從大軍北征多所
俘獲進濟陽衛指揮僉事鎮開平燕兵破居庸懷來忠以
開平降從徇灤河拔其城白溝河之戰忠單騎突陣一指
中流矢未暇去鏃急抽刀斷之控滿疾驅殊死戰燕王乘
高見之謂左右曰眞壯士也入京師自指揮同知累遷都
督僉事封永康侯祿一千一百石子世參忠每戰摧鋒跳
盪爲諸將先而馭軍甚嚴所過無擾善撫降附得其死力
事繼母以孝聞夜歸必掛家廟而後入儉約恭謹未嘗有
過成祖北巡以忠老成畱輔太子監國永樂十一年八月
卒贈蔡國公諡忠烈傳爵至裔孫錫登崇禎末死於賊從

兄錫蔭嘗襲侯卒無子其妻朱氏成國公純臣女也夫歿

樓居十餘年不履地城陷捧廟主自焚死

明史列傳

郭亮合肥人爲永平衛千戶燕兵至以城降卽命爲守時燕師初起先略定旁郡邑旣克居庸懷來山後諸州皆下而永平地接山海關障隔遼東旣降北平益無患成祖遂南敗耿炳文於真定旣而遼東鎮將江陰侯吳高都督楊文等圍永平亮拒守甚固援師至內外合擊高退走未幾高中譏罷楊文代將復率衆來攻亮及劉江合擊大敗之累進都督僉事成祖卽位以守城功封城安侯祿千二百石世伯爵永樂二十一年三月卒贈興國公諡忠壯妾韓氏自經以殉贈淑人子晟當嗣伯仁宗特命嗣侯宣德五年

坐扈駕先歸革爵尋復之無子弟昂嗣伯爵

明史列傳

張禮巢縣人遵化千戶從靖難功署中都留守在任十有六年軍律嚴明人皆畏服

明隆慶志

李讓舒城人以燕邸儀賓從起靖難力戰破平安兵永樂初進駙馬都尉封富陽侯掌北京刑部事卒贈景國公諡恭

康熙志

史昭合肥人永樂初積功至都指揮僉事八年充總兵官鎮涼州土軍老的罕先與千戶虎保作亂虎保敗老的罕就撫昭上書言其必叛狀未至而老的罕果叛昭與都指揮滿都等擊平之移鎮西寧仁宗立進都督僉事上言西寧風俗鄙悍請設學校如中土報可宣德初昭以衛軍守禦

不暇屯種其家屬墾力田者七百七十餘人請俾耕藝收其賦以足軍食從之五年曲先衛都指揮使散卽思邀劫西域使臣昭率叅將趙安偕中官王安王瑾討之散卽思望風遁擒其黨答答不花等威震塞外七年春以征西將軍鎮寧夏字的達里麻犯邊遣兵擊之俘獲甚眾進都督同知正統初昭以寧夏曠遠難守請於花馬池築哨馬營增設烽墩直接哈刺兀速之境邊備大固尋進右都督時阿台朵兒只伯數寇邊詔昭與甘肅守將蔣貴趙安進剿竝無功貶都督僉事三年復右都督八年以老召還明年卒

明史列傳

陳圭

合肥人陳瑄從孫

以薦出鎮兩廣封川寇起圭督諸將往討擒

其魁俘斬數千加太子太保復平柳慶及賀連山賊加太保蔭一子安南范子儀等寇欽廉黎岐賊寇瓊崖相犄角圭移文安南曉以利害使縛子儀而急出兵攻黎岐敗走之論功復蔭一子加茂祿四十石圭能與士卒同甘苦聞賊所在輒擐甲先登深箐絕壑衝冒瘴毒無所避以故所向克捷在粵且十年殲諸小賊不可勝數召還掌後軍府圭妻仇氏咸寧侯鸞女弟也圭深嫉鸞鸞數短圭於世宗幾得罪鸞敗帝益重圭命總京營兵董萊京師外城加太子太傅卒贈太傅諡武襄子王謨嗣僉書後軍出鎮兩廣賊張璉反屠掠數郡王謨會提督張臬討平之論功加太子太保蔭一子萬歷中出鎮淮安總漕運入掌前軍府事

卒贈少保諡武靖

明史陳瑄傳

國朝

鄭能合肥人武安侯亨裔孫起行伍康熙辛丑從征臺灣攻鹿耳門奪砲臺恢復安平鎮又從南澳總兵戰蘇厝甲克臺灣敘功加四等雍正癸卯大挑功臣授藍翎侍衛旋任河南府守備累官萊州營叅將以病休乾隆丙子奉

旨歲賜銀米追恤前功

董金鳳字向桐合肥人乾隆戊戌一甲三名進士以侍衛任河南歸德營叅將乙巳夏柘邑飢民搆亂金鳳率數十騎勦平之擢福建興化營副將降洋匪翁泉等署福寧鎮總兵南澳素多盜金鳳焚其林木匪船無所匿自是稱樂土

調臺灣副將值嘉義兵警金鳳勦之誅其渠魁以病卒於
官陸子承恩通判

廬州府志卷三十

忠節

王蕃

劉整

劉整

詹世勛

密佑

劉師勇

洪福

褚一正

余闕

鮑文德

王翰

徐明

汪河

王仁

后明

朱昇

王德

廖永安

宋國興

桑世傑

汪澤

陳沖

濮英

陳植

瞿能

余瑱

徐凱

甯忠

廖鏞

褚能

子斌

周讓

陳懷

姚壽

周璽

李紹賢

錢策

盧謙

張受 畢伊周

曹同申

金玉度

張宏任

黃克嘉

趙之璞

程楷

胡守恆

樊孔學

沈志傑

沈可仕 沈可則

趙嗣蕃

楊鴻功

張四哲

弟四美 四奇

吳士任

蔡世和

朱應珍

趙宏璧

張會奇 張拱祿

葛遇明

張以 嚴成忠 彭長齡

王善慶

陸合新

徐奇

張宏化

高翰沖

楊無墊

馬應奎

黃得功

馮正中

郭象儀

呂學望

張應弼

子正藻 正庭

正德

齊建昌

正蒙

談耀祖

許三俊

弟三宅 鍾和

如鍾元

鍾淳

柳生金

談華潤

李陽春

弟先春 鍾和

夏斗光

子元勳 鍾和

路寬

王加惠

吳之馱

徐日章

楊彪

阮自雄

王承業

劉承恩

鍾邦任

許國程

潘升

張至幹

廬州府志卷三十

賜進士出身廬州府知府溫陵張祥雲主修

忠節

三國

王蕃字永元廬江人也博覽多聞兼通術藝始爲尚書郎去
官孫休卽位與賀邵薛瑩虞汜俱爲散騎中常侍皆加駙
馬都尉遣使至蜀還爲夏口監軍孫皓初復入爲常侍與
萬彧同官彧與皓有舊俗士挾侵謂蕃自輕又中書丞陳
聲皓之嬖臣數譖毀蕃體氣高亮不能承顏順指時或
迂意積以見責甘露二年丁忠使晉還皓大會羣臣蕃沈
醉頓伏皓疑而不悅舉蕃出外頃之請還酒亦不解蕃性

有威嚴行止自若皓大怒呵左右於殿下斬之衛將軍滕
牧征西將軍雷平請不能得丞相陸凱上疏曰常侍王蕃
黃中通理知天知物處朝忠蹇斯社稷之重鎮大吳之龍
逢也昔事景皇納言左右景皇欽嘉歎爲異倫而陛下忿
其苦辭惡其直對臬之殿堂尸骸暴棄郡內傷心有識悲
悼其痛蕃如此蕃死時年三十九皓往蕃家屬廣州二弟
著延皆作佳器郭馬起事不爲馬用見害

三國志吳列傳

劉整鄭像魏嘉平六年鎮東將軍母邱儉上言昔諸葛恪闔
合肥新城城中遣士劉整出圍傳消息爲恪所得考問所
傳語整曰諸葛公欲活汝汝可具服整罵曰死狗此何言
也我當必死爲魏國鬼不求苟活遂汝去也欲殺我者便

速殺之終無他辭又遣士鄭像出城傳消息或以語恪恪遣馬騎尋圍迹索得像還四五人的頭面縛將繞城表勅語像令大呼言大軍已還洛不如早降像不從其言更大呼城中曰大軍近在圍外壯士努力賊以刀築其口使不得言像遂大呼令城中聞知整像爲兵能守義執節子弟宜有差異詔曰夫顯爵所以褒元功重賞所以寵烈士整像各募通使越蹈重圍冒矢白刃輕身守信不幸見獲抗節彌勵揚六軍之大勢安城守之懼心臨難不顧畢志傳命昔解揚執楚有隕無二齊路中大夫以死成命方之整像所不能加今追賜整像爵關中侯各除士名使子襲爵如部曲將死事科

三國志魏三少帝紀

唐

袁傑無為人唐末盜亂傑招集義兵保障鄉里拒敵不勝死屍僵七日不仆賊棄諸河逆流而上將至黃金城母尋見之曰若是吾兒呼之必動呼果動鄉人神之因立廟名其處曰呼兒港 江南通志

宋

詹世勛其先婺源人祖徙家於舒城為人修偉沈毅恂恂似不能言在縣揮金如土當機而發其勇莫敵紹興三十年累薦為舒城縣民兵正將弟世勣副之招募強壯結以信義淮西帥奇之薦為義兵部將與金人拒於柞柘原金人招之使降世勣叱之誓其決死罵不已敵怒擲箭射之世

訪被瘡傷重一夕不語亦不呻吟次日早呼其子大淵戒之曰我今死矣汝必繼我志言終而卒少頃復張目其長子輔謂大淵曰父告汝未答故視汝也大淵於是撫父之額而泣曰父苟終所不繼父志者有如栲栳原目乃瞑明

隆慶志

密佑其先密州人後渡淮居廬州佑爲人剛毅質直累官至廬州駐劄御前遊擊中軍統領改權江西路副總管咸淳十年以閤門宣贊舍人爲江西都統是冬元丞相伯顏下鄂州留石丞阿里海牙守之而將大兵東下明年二月朱禩孫遣高世傑取鄂阿里海牙以兵逆擊執世傑荆江口兵盡潰半入江西江西制置黃萬石招集之且募寧都廣

昌南劔義兵千餘人盡以屬佑十一月大兵至隆興劉槃
兵敗乃嬰城自守萬石時移治撫州將遁懼佑不從乃調
佑兵援槃且戒以勿戰未至隆興槃已降都統夏驥率所
部兵潰圍出已而元帥張榮實呂師夔提兵逼撫州佑率
眾逆之進賢坪兵來呼曰降者乎鬪者乎佑曰鬪者也麾
其兵突戰進至龍馬坪元兵圍之數重矢下如雨佑告其
部曰今日死日也若力戰或有生理衆咸憤厲自辰戰至
日昃佑面中矢拔之復戰又身被四矢三槍衆皆死僅餘
數十人佑乃揮雙刀斫圍南走前渡橋馬踏板斷遂被執
衆見其勇戒勿殺輿歸隆興元帥宋都得曰壯士也欲降
之繫之月餘終不屈嘗罵萬石爲賣國小人使我志不得

仲未都解命劉槃呂師夔坐城樓引佑樓下以金符遺之許以官佑不受語侵槃師夔益不遜又令佑子說之曰父死子安之佑斥曰汝行乞於市第云密都統子誰不憐汝也怡然自解其衣請刑遂死觀者皆泣下

宋史列傳

劉師勇廬州人以戰功歷環衛官檣港師潰賈似道欲東入海師勇贊之入揚州圖再舉姚晷復常州似道命師勇以淮兵取呂城朝廷加師勇和州防禦使助晷守常而以張彥守呂城合兵拒元戰失利彥馬弱陷淖中見執元軍挾至城下招降師勇以大義斥彥彥慚退又遣范文虎來諭師勇伏弩射走之常州受圍數月拔兵盡絕有羣鴉飛鳴繞城輒惡爲不祥俄而城陷師勇拔砦且戰且行其弟所

乘馬墮塹不能出師勇舉手與訣而去淮兵數千人皆鬪
死有婦人伏積屍下見淮兵六人反背相拄殺敵千百人
乃殪師勇從二王至海上見時事不可爲憂憤卒塋於鼓

山 宋史張世傑傳

洪福夏貴家僮也從貴積勞爲雄江左軍統制鎮江北貴以
城降元福與子大淵大源下班祇候彭元亮結貴軍復之
加右武大夫知鎮巢貴招福降不聽使從子來說福斬之
元兵攻城久不拔貴至城下好語語福請單騎入城福信
之門發而伏兵起執福父子屠城中貴令殺大源大淵呼
曰法止誅首謀奈何舉家爲戮福叱曰以一命報宋朝何
至向人求活耶次及福福大罵數貴不忠請身南向死以

明不背國也聞者流涕

宋史姜才列傳

褚一正字粹翁舉武科德祐二年爲提刑諮議督戰高沙被

劊自投於水

宋史列傳

元

余闕字廷心一字天心合肥人唐兀氏世家河西武威父沙
刺臧卜官廬州遂爲廬州人少喪父授徒養母與吳澄弟
子張恆游文學日進元統元年賜進士第授同知泗州事
爲政嚴明宿吏皆憚之俄召入應奉翰林文字轉中書刑
部主事以不阿權貴棄官歸尋以修遼金宋三史召復入
翰林爲修撰拜監察御史改中書禮部員外郎出爲湖廣
行省左右司郎中會莫瑤蠻反右丞沙班當帥師堅不往

無敢讓之者。闕曰：右丞當往受天子命，爲方嶽重臣，不思執弓矢討賊，乃欲自逸耶？右丞當往。沙班曰：郎中語固是，如芻餉不足，何闕曰：右丞第往，此不難致也。闕下令趣之。三日，皆集。沙班行復，以集賢經歷召入，遷翰林待制。出僉浙東道廉訪司事。丁母憂歸。廬州盜起，河南陷，郡縣至。正十三年，行中書於淮東，改宣慰司爲都元帥府，治淮西。起關副使僉都元帥府事，分兵守安慶。于時南北音問隔絕，兵食俱乏，抵官十日而寇至，拒却之。乃集有司與諸將議屯田戰守計，環境築堡，裝選精甲，外捍而耕稼于中。屬縣潯山八社，土壤沃饒，悉以爲屯。明年春夏大饑，人相食，乃捐俸爲粥以食之，得活者甚衆。民失業者數萬，咸安集之。

請於中書得鈔三萬錠以賑民陞同知副元帥又明年秋
大旱爲文祈澗山神三日雨歲以不饑盜方據石蕩湖出
兵平之令民取湖魚而輸魚租十五年夏大雨江漲屯田
禾半沒城下水湧有物吼聲如雷闕祠以少牢水輒縮秋
稼登得糧三萬斛闕度軍有餘力乃浚陞增陴陞外環以
大防深塹三重南引江水注之環植木爲柵城上四面起
飛樓表裏完固俄陞都元帥廣西苗軍五萬從元帥阿思
蘭沿江下抵廬州闕移文謂苗蠻不當使之窺中國詔阿
思蘭還軍苗軍有暴於境者卽收殺之凜凜莫敢犯時羣
盜環布四外闕居其中左提右挈屹爲江淮一保障論功
拜江淮行省叅知政事仍守安慶通道于江右商旅四集

池州趙普勝帥眾攻城連戰三日敗去未幾又至相拒二旬始退十七年趙普勝同青軍兩道攻我拒戰一月餘竟敗而走秋拜淮南行省右丞安慶倚小孤山爲藩蔽命義兵元帥胡伯顏統水軍戍焉十月沔陽陳友諒自上游直擣小孤山伯顏與戰四日夜不勝負急趣安慶賊追至山口鎮明日癸亥遂薄城下關遣兵扼於觀音橋俄饒州祝寇攻西門關斬卻之乙巳賊乘東門紅旗登城關簡死士力擊賊復敗去戊申賊并軍攻東西二門又卻之賊恚甚乃樹柵起飛樓庚戌復來攻金鼓聲震地關分諸將各以兵扞賊晝夜不得息癸卯賊益生兵攻東門丙午普勝軍東門友諒軍西門祝寇軍南門羣盜四面環集於無一甲之

援西門勢尤急闕身當之徒步提戈爲士卒先士卒號哭
止之揮戈愈力仍分麾下將督三門之兵自以孤軍血戰
斬首無算而闕亦被十餘創日中城陷城中火起闕知不

可爲引刀自剄墮清水塘中闕妻耶卜氏及子德生女福

童皆赴井死

按賈伯良死節記作夫人蔣氏女安安子得
臣俱赴水死甥福童載死姪增花李亦自剄

與此城中民死者以千計時至正十八年正月丙午也闕

號令嚴信與下同甘苦然稍有違令卽斬以徇闕嘗病不
視事將士皆頷天求以身代闕闕強衣冠而出當出戰矢
石亂下如雨士以盾蔽闕闕卻之曰汝輩亦有命何蔽我
爲故人爭用命稍暇卽注周易帥諸生謁郡學會講立軍
士門外以聽使知尊君親上之義有古良將風烈或欲挽

闕入翰林闕以國步危蹙辭不往其忠國之心蓋素定也
卒時年五十六事聞贈闕摠誠守正清忠諒節功臣榮祿
大夫淮南江北等處行中書省平章政事柱國追封幽國
公謚忠宣議者謂自兵興以來死節之臣闕與褚不華爲
第一闕留意經術五經皆有傳注爲文有氣魄能達其所
欲言詩體尙江左高視鮑謝徐庾以下不論也篆隸亦古
雅可傳初闕旣死賊義之求屍塘中具棺斂葬於西門外
洪武初詔立廟於忠節坊命有司歲時致祭云

元史列傳

鮑文德舒城人至正間爲萬戶侯鎮廬州路趙雙刀攻城文

德爲礮石所傷而卒

康熙志

王翰字用文其先靈武人陷於元

元初從下江淮授領兵

千戶賜姓唐兀氏鎮廬州家焉翰襲爵仕名那木罕年十六領所部有能名除廬州府治中陞同知又陞理問官理永福羅源二縣拒泉州土帥抑莽四境又安撫福建江西行省郎中陳友定表授潮州路總管兼督循海惠三州友定敗隱居永福縣東之觀獵山爲黃冠洪武十年辟書再下翰賦詩見志遂自引決子傳永樂中名臣

康熙志

森明合肥人有膽略多智數軍中號胎裏謊授管軍百戶守洪都陳友諒攻新城門明從指揮薛顯開門突戰被執死之一云明出劫友諒營獲其良馬以歸友諒陰設陷奔數

誘戰是日明垂鞭躍馬出城射賊賊走追之墜窰中

取去誘之降不從見殺追封合肥縣男配享洪都忠

官其子爲指揮

康熙志

每城人嘗師余闕以文章名從渡江爲行中書省掾數
稟時務太祖高其才進大都督府都事使察罕議論稱旨
受奉命借錢楨至河南報擴廓聘爲所留太祖前後七致
書不報洪武元年大軍下河洛擴廓走定西河始
得歸被拘凡六年帝甚嘉之進吏部侍郎備陳西征方略
二年改御史臺侍御史九年拜晉王左相親御便殿諭遣
之語數歲卒於官

明史楊元杲傳

城人趙勇善騎射太祖駐兵和州隸帳下累功授管
軍

癸卯從上親征友諒大戰於鄱湖遂歿於陣上追

錄劾忠死敵之臣贈武毅將軍飛騎尉封舒城縣男建廟於康山肖像祀之

明崇禎志

后明

康熙志作祁

合肥人甲午歸附從克和州渡江收太平入建

康收下江南等處累立戰功授管軍上千戶癸卯六月僞漢陳友諒舉兵圍南昌守將朱文正告急上率諸將士往援之遇於康郎山大戰數日明奮力死於陣諒腹上追念明等捐軀狗國命立廟於康山肖像祀之仍追贈武節將軍飛騎尉封梁縣子

明隆慶志

朱昇合肥人勇悍多力善馬稍歲乙未與巢湖水將俞通海等歸附從渡江多立戰功授管軍上千戶癸卯七月從太祖討陳友諒遇於鄱陽湖昇奮勇迎擊面臂中數矢而死

追贈武節將軍上勇騎都尉封合肥縣子復命有司卽其
死所建忠臣廟設像歲時祭之

明隆慶志

王德合肥人元季兵亂初爲他帥所得度其無成乃脫身來
歸翊從渡江拔采石取太平定江南等處皆有功太祖愛
其勇力授管軍上千戶癸卯七月陳友諒率兵六十萬攻
圍南昌守臣告急太祖解廬州圍赴之遇友諒兵於康郎
山自戊子至辛丑酣戰累日德奮勇誓殲強寇死于陣友
諒敗追贈武德將軍饒騎尉封合肥縣子仍命有司建廟
于康郎山肖像歲時祭之

明隆慶志

廖永安字彥敬德慶侯永忠兄也太祖初起永安兄弟偕俞
通海等以舟師自巢湖來歸太祖親往收其軍遂以舟師

攻元中丞蠻子海牙於馬場河元人駕樓船不利進退而永安輩操舟若飛再戰再破元兵始定渡江策頃之發江口永安舉帆請所向命直指牛渚西北風方驟頃刻達岸太祖急揮甲士鼓勇以登采石鎮兵皆潰遂乘勝取太平授管軍總管以舟師破海牙水柵擒陳兆先入集慶擢建康翼統軍元帥以舟師從取鎮江克常州擢同僉江南行樞密院事又以舟師同常遇春自銅陵趨池州合攻破其北門執徐壽輝守將遂克池州偕俞通海拔江陰之石牌戍降張士誠守將欒瑞擢同知樞密院事又以舟師破士誠兵於常熟之福山港再破之通州之狼山獲其戰艦以歸遂從徐達復宜興乘勝深入太湖遇吳將呂珍與戰後

軍不繼舟膠淺被執永安長水戰所至輒有功士誠愛其
才勇欲降之不可爲所囚太祖壯永安不屈遙授行省平
章改事封楚國公永安被囚凡八年竟死於吳吳平喪還
太祖迎祭於郊洪武六年加贈開國輔運推誠宣力武臣
光祿大夫柱國已又改封永安郎國公無子授其從子昇
爲指揮僉事

明史列傳

宋因典定遠人世居合肥國興生而壯偉從父朝用渡江年
十八以總管先登與陳也先戰南臺上解白龍袍衣之敵
誤以爲上也攢槊刺之至死常遇春翼上潰圍出是日妻
曹氏聞變投井上命以國典官授其弟晟

康熙志

秦世傑無爲人亦自巢湖來歸趙普勝有異志世傑發其謀

普勝逸去從渡江以舟師破元水軍授秦淮翼元帥下鎮江狗金壇丹陽攻寧國長槍諸軍克水陽平常州判行樞密院事略地江陰宜興張士誠拒高郵遣元帥欒瑤戍石牌太祖命永安及世傑擊之世傑力戰死太祖念其功贈安遠大將軍輕車都尉永義侯衍享太廟子敬以父死事累官都督府僉事洪武二十三年封徽先伯歲祿千七百石子世券明年同徐輝祖等防邊尋令屯軍平陽坐藍玉

黨死

明史列傳

汪澤廬江人饒勇有志節吳元年任管軍千戶都陽湖戰歿贈武節將軍驍騎尉封廬江縣子祀康郎山

康熙志

陳冲巢縣人從征陳友諒戰都陽湖死之追封爲巢縣子

英廬州人初以勇力爲百夫長積功至西安衛指揮坐軍政不修召還詰責遣葉昇代之昇更言其賢令還衛洪武十九年太祖命耿炳文選陝西都司衛所卒備邊惟英所練稱勁旅加都督僉事明年命帥所部隨大將軍馮勝北征抵金山降納哈出遂班師而以英將奇兵三千人爲殿納哈出餘眾竄匿者尙數十萬聞師旋設伏於途謀俟大軍過竄取之未發英後至猝爲所乘銜突不能出馬踣遂見執敵旣得英思挾爲質英絕食不言乘間引佩刀剖腹死事聞贈金山侯諡忠襄明年進贈樂浪公封其子璵爲西涼侯祿二千五百石子世券二十三年命練兵東昌又

令駐臨清訓練士卒二十五年召還同宋國公勝等簡閱山西士馬瑛能修父職帝甚嘉之復令籍山西民兵所籍州縣最多事集而不擾明年坐藍玉黨戍五開死

明史列傳

陳植廬江人元末舉鄉試不仕洪武間官吏部主事建文二年官兵部右侍郎燕兵臨江植監戰涇上慷慨誓師部將有議迎降者植責以大義甚厲部將殺之以降且邀賞燕王怒立誅部將具棺殮葬植白石山上

明史陳性善傳

瞿能合肥人父通洪武中累官都督僉事能嗣官以四川都指揮使從藍玉出大渡河擊西番有功又以副總兵討建昌叛酋月魯帖木兒破之雙狼寨燕師起從李景隆攻北平與其子帥精騎千餘攻張掖門垂克景隆忌之令侯大

軍同進於是燕人夜汲水沃城方大寒冰凝不可登景隆卒致大敗已又從景隆進駐白溝河與燕師戰能父子奮擊所向披靡日暝各收軍明日復戰燕王幾爲所及王急佯招後軍以疑之得脫去薄暮能復引衆搏戰大呼滅燕斬馘數百諸將俞通淵滕聚復帥衆來會會旋風起王突入馳擊能父子死於陣

明史列傳

余瑱合肥人北平都指揮使同官謝貴密謀以拒靖難師貴死瑱走居庸關宋忠承制令瑱守關瑱飭練騎卒得數千人將進攻北平文皇以居庸險隘爲北平咽喉命指揮徐安等往擊之瑱且戰且守糧兵不至棄關走懷來兵再敗被執不屈死之

明隆慶志

徐凱合肥人以開國功爲茂州衛指揮使守松潘出征賈哈刺并刀幹孟皆有功陞都督僉事鎮守四川靖難兵起充副總兵官練兵臨清出鎮滄州與吳傑平安等相爲犄角兵敗被執不屈死

明隆慶志

甯忠合肥人累官都督建文初充征虜右副將軍與駙馬都尉李堅從大將李景隆進拒北平戰于真定敗奔滹沱河再戰又敗與都督顧成都指揮劉遂皆被執不屈死

明隆

慶志

廖鏞字大聲永忠孫與弟銘同學於方孝孺任散騎舍人累官提督方死二人收其遺骸葬聚寶門外被收論死

康熙志

褚能合肥人永樂間官懷遠將軍壽州衛指揮同知洪熙元

年改廬州衛宣德二年調征交趾與子斌俱陣亡追封斌
懷遠將軍孫英襲廬州衛指揮同知八世孫翰以海運功
積官左都督翰孫煇煇子楷均襲職

周讓字克遜無爲人洪武中監生通敏博辯倜儻尙氣節以
劉基薦任給事中永樂初兩使西域被拘懾以威勢徙之
荒野瀕死者數四讓終不屈諭以本朝恩信辭旨嚴正卒
令番人隨之入貢太原劉寅謂讓與蘇中郎無異而宣揚

國威始終王事似又過之有重使古刺集備載其事

康寧志

陳懷合肥人襲父職爲真定副千戶永樂初積功至都指揮
僉事從平安南進都指揮使莅山西都司事再從張瑄會
安南賊備定從都督費瓚征涼州倭人虎保皆有功仁壽

立進都督同知代梁銘爲總兵官鎮寧夏進左都督雷鎮
四川言官劾懷僭侈躡分召還正統二年以原官鎮大同
九年與中官但住出古北口征兀良哈還封平鄉伯十四
年扈駕北征死土木贈侯諡忠毅子輔襲爵輔卒子政嗣
政鎮兩廣久自陳軍功乞世券詔予之政卒子信嗣宏治
中卒無子弟俊嗣指揮使

明史列傳

姚壽字維祺舒城人成化甲辰進士授行人擢御史二十年
不遷官正德中屢疏指斥中貴爲逆瑾所惡謫貴州驛丞
慮不免自裁以死抗直遭難聞者惜之

康熙志

周璽字天章廬州衛人宏治九年進士授吏科給事中二遷
禮科都給事中慷慨好言事武宗初卽位請毀新立寺觀

屏逐法師真人停止醮事並論前中官齊元練丹糜金罪
頃之以久雨偕同官劾侍郎李溫太監苗達九月以星變
復劾溫及尙書崔志端熊狎賈斌都御史金澤徐源等狎
溫澤因是罷帝遣中官韋興守郎陽璽力言不可尋復偕
同官言邇者聰明日蔽膏澤未施講學一暴而十寒詔令
朝更而夕改冗員方革復留鎮監撤還更遣解戶困於交
收鹽政壞於陳乞厚戚晚而駕帖頻頒私近習而帑藏不
敷不可不亟爲釐正不聽正德元年復應詔陳八事中劾
大寮賈斌等十一人中官李興等三人勦戚張懋等七人
邊將朱廷解端李稽等三人未幾言陛下卽位以來鷹犬
之好糜費日甚如是不已則酒色游觀便佞邪僻凡可以

悅耳目蕩心志者將無所不至光祿上供視舊十增七八
新政已爾何以克終御史何天衢等亦以爲言章下禮部
尙書張昇請從之帝雖不加譴不能用也明年擢順天府
丞重論諫深切率與中官牴牾劉瑾等積不能堪至是命
璽與監丞張淮侍郎張縉都御史張鸞錦衣都指揮楊玉
勸近縣皇莊玉瑾黨三人皆下之璽辭色無假且公移與
玉止牒文玉奏璽侮慢敢使瑾卽矯旨逮下詔獄榜掠死
瑾誅詔復官賜祭恤其家嘉靖初錄一子

明史列傳

李紹賢字崇德其先巢人編伍泗州正德丁丑舉進士除行
人篤學敦行遇事果決以小臣抗疏諫止南巡上震怒命
杖五十劓甚數日死邸中蕭然二僕爲具含斂聞者泣下

嘉靖初蒙卹典蔭一子入太學

康熙志

錢策字國猷無爲人萬歷辛丑進士入南刑部東寧焦侯子
毆殺奕客李秋誣以盜諸司畏勢不敢問策按其獄論如
法以此得名改職方以部民力攻漕撫與諸賢論不協出
之守貴陽聽調回籍天啓初葉猶雜沓起光祿少卿歷南
助卿後推操江通政少司寇不果用乙亥寇亂有孤城善
後之疏壬午城陷被執不屈死之贈大理寺卿蔭一孫入

監讀書

康熙志

盧謙字吉甫廬江人萬曆三十二年進士授永豐知縣擢御
史出爲江西右參政引疾歸崇禎八年二月流賊犯廬江
士民具財帛求免賊僞許之俄襲陷其城謙服命服危坐

中門賊至欲屈之罵曰吾朝廷憲臣肯爲賊屈邪鼠輩亡
在卽安敢無禮賊怒殺之投屍於池池水盡赤舉人張受
畢尹周亦不屈被殺謙贈光祿卿

明史列傳

曹同申字幼伯巢縣人任湖廣鄖西知縣鄖經殘破又安插
降寇老當當署事者僅於江干棲泊同申莅任集流移修
城垣爲固守計忽張獻忠約降寇爲內應倉卒被執同申
護印不與死之當事疏請照郝景春例優恤

康熙志

金玉度字冲若合肥人崇禎甲戌武進士性溫雅不類武人
守崇明同里寇至協守時雍門率家僮數十人巷戰力屈
死之

康熙志

張宏任字曾士廬江人崇禎癸酉舉人授四川威遠知縣時

賊勢猖獗宏任誓死守城令長子振祚領數騎突圍夜出
求救未至城陷爲賊所執誘以官宏任曰我爲國守土牧
民今日之事有死而已肯從爾作賊耶賊怒殺之甚慘子
振祚振祺見孝義

康熙志

黃克嘉合肥武進士道年子嫻韜略善騎射崇禎末任湖東
守備山賊聚長塘克嘉兩次討平之福建閩羅宋三家賊
烏合萬眾憲檄廣建諸營合勦克嘉臨陣先登因馬蹶遇
害將死掀髯語賊曰毋令血污我鬚賊稱好漢時甲申七
月十九日也

康熙志

趙之璞字運城合肥人廬州衛指揮同知張獻忠寇廬州之
璞分守小東門城潰與賊遇四牌樓賊死

康熙志

程楷字疇人合肥人豐偉端凝讀書於大蜀之雪霽山房所
爲文極奇縱天啟乙丑成進士知平湖縣陟南禮部郎出
守東昌屬吏有以陋規進者峻拒之歷雲南叅政未久歸
養壬午郡城被圍楷與經歷鄭元壽明史守南薰門五月七
日賊衆登城始疑兵變旣而知爲賊也力戰死之越數日
就殮面色如生配高氏聞難投繯漕撫史公可法爲文祭
之狀聞贈光祿卿廕一子入監讀書祀鄉賢

康熙志

胡守恆字見可舒城縣人幼喪母每逢霜露輒感泣事後母
如所生崇禎戊辰進士授嘉興推官以清剛爲直指所倚
重因陪巡撫德清令墨迹上之令伺守恆出賄金某襲納
署中守恆歸急命持去勒其人以病免甲戌召試平臺改

翰林院編修晉東宮講官一日上命東宮講論語大悅命
守恆條酌御前諸章奏敷陳稱旨諭好侍東宮以需大用
庚辰較禮閣事竣乞歸養疏十上得允抵家卽倡義賑荒
壬午張獻忠陷舒城被執罵不絕口死最慘烈漕撫史可
法疏聞贈少詹事謚文節賜祭葬蔭一子入太學配孔氏
難後攜二子奉姑僦居江寧宗戚之渡江而南者踵至命
二子盡納之每食與共而朝夕自噉粥糜壬辰返故廬值
歲凶典簪珥得米百餘斛設賑于石佛寺

康熙志

樊孔學廬州衙百戶崇禎乙亥寇圍城孔學領眾出北門奮
擊秋潰被執遺語城上曰賊豨兒皆紙不足懼但慎防禦
可也賊怒磔其屍有魯宏道者材力過人以誠守功題授

守備

康熙志

沈志傑無爲人武生崇禎辛巳流賊犯境率子姪可仕可則以鄉兵六十餘人乘夜斫賊營不勝遂俱罹難州上其事允建祠祀朱芾煌作戰城南弔之

康熙志

趙嗣蕃字千之合肥人邑諸生城潰嗣蕃衣冠坐堂上賊強之跪不屈啗以衣馬不受賊怒牽至西門縛於樹罵不絕口鉗其舌以血噴之死後兩學具呈請彰士節

康熙志

楊鴻功字冲若巢縣諸生乙亥賊去後入城細訪忠孝節義闡幽發微錄成一書名曰屬陬錄惟鋒刃者男婦凡一萬三千餘人義婢僕罵賊不屈者皆錄之壬午城復陷偕兩子寓大力寺賊執見其渠魁鴻功說以天道人事聲色俱

厲將被殺兩子爭以身代皆死一時競傳爲孝烈云

康熙志

張四哲合肥人乙亥率弟四美四奇戰城下不勝謂兩弟曰
郡城來日必陷與其被戮辱死不如舉家清白死遂偕弟
及妻女等一十五口盡投於井

康熙志

吳士任字顯伯合肥人郡諸生以忠義自誓城陷力戰被創
死

康熙志

蔡世和字強子合肥人鄉賢悉之孫也邑諸生罵賊死

康熙志

朱應珍合肥人素行不阿崇禎壬午城陷罵賊死越三日兩
子入城至演武場遙見一屍動搖若招呼狀趨視之其父

也枕哭殮焉

康熙志

趙宏璧字元白張愈奇字孟庸葛過明字澹如張拱祿字綬

之嚴成惠字濟之張弓字天猶王善慶字爾餘以上七人皆巢邑諸生又彭長齡字修祺俱於城陷之日罵賊被害

康熙志

陸合新字涵臺巢縣舉人崇禎乙亥流賊陷巢合新衣冠端坐賊脅之使跪合新曰我三十年孝廉肯爲鼠輩屈膝耶拔劍砍賊被殺事聞奉勅建坊

康熙志

徐奇巢邑諸生城破日謂妻女曰我家世清白不可受辱汝等當自盡親視其妻及二女就經一妹歸寧亦自剄然後從容自縊較之諸人尤極慘烈

康熙志

張宏化字駢公合肥人崇禎諸生鼎革後學使者檄赴和陽應試語人曰堯舜在上下有巢由武王克商孤竹餓死子

將從二子遊耳乃步入文廟哭拜先聖焚其衣巾越月語
家人曰死期至矣整冠別父條然而逝

康熙志

高翰冲字雲翔合肥人文行素優肄業蜀山僧舍以古人自
命甲申聞變涕泣累月投繯而殞

康熙志

楊無塾巢縣諸生明亡不食七日而死

康熙志

馬應奎字守卿廬江人以武職從史督輔征戰有功屢陞南
京大教場坐營叅將加副將乙酉與史公同殉刑上先二
日知城必不守預作家書報父母訣妻子有真我何曾死
假我何曾生不愧鬚眉四十年之語見地了當殆幾於禪
悟云

康熙志

黃得功號虎山開原衛人其先自合肥徙早孤與母徐居少

負奇氣膽略過人隸經略爲親軍累功至遊擊崇禎九年
遷副總兵從總督熊文燦擊賊於舞陽磨光固閒最又從
擊賊馬光玉於浙川大破之詔加太子太師署總兵銜十
三年從太監盧九德破賊於板石阪賊革裏眼等五營降
十四年與王憲分護鳳陽泗州陵駐定遠張獻忠攻桐城
得功與劉良佐合擊之鮑家嶺賊敗遁追至潛山轉戰十
餘日所殺傷獨多明年移鎮廬州十七年封靖南伯福王
立江南進封侯命與劉良佐劉澤清高傑爲四鎮督輔史
可法慮傑跋扈難制置得功儀真陰相牽制明年傑欲趨
河南規取中原詔得功與劉良佐守邳徐傑死得功遂移
鎮廬州左良玉東下以清君側爲名至九江病死軍中立

其子夢庚命得功趨上江禦之駐師荻港得功破夢庚於
銅陵解其圍命移家鎮太平一意辦賊論功加左柱國得
功戰荻港時傷臂幾墜以帛絡臂佩刀坐小舟督麾下八
總兵迎敵忽飛矢至中其喉偏左得功知不可爲擲刀捨
所拔箭刺吭死其妻聞之亦自經得功每戰飲酒數斗酒
酣氣益厲喜持鐵鞭戰鞭漬血沾手腕以水濡之久乃得
脫軍中呼爲黃鬪子其軍行紀律嚴下無敢犯所至人感
其德廬州桐城定遠皆爲立生祠葬儀真方山毋墓側得
功粗猛不識文義然忠義出自天性聞以國事相規誠者
輒改不旋踵北來太子之獄抗疏爭曰東宮未必假冒先
帝子卽上子未有了無證明濕然雷同者臣恐在廷諸臣

諸狗者多抗顏者少即明白認認亦不敢抗詞取禍矣時太子眞僞莫敢決而得功忠憤不阿如此

明史列傳

馮正舒城人中軍都督府僉事正德七年征流寇至洛陽賊走渡河身先士卒追之殺獲甚眾會雨下如注後軍不繼遂死於賊時三月初八日次年是日風霾大作洛人祀之又次年是日亦如之地方官以聞令立祀洛河原上每歲於是日致祭贈洛州伯子大全嗣

縣志

郭象儀字維修舒城人以鄉舉選授四川順慶府推官時值土酋作亂勢甚猖獗奉檄帥師討之公奮身披堅執銳見賊勢逼成都致書諸帥共矢滅此朝食軍威乃震賊遂遁公乘勝直搗賊穴遇害事聞贈光祿卿蔭一子廬州衛千

戶崇祀報功祠

縣志

呂學望字渭濱廬江人商邱丞佐治一載以疾歸崇禎乙亥
寇變同廬御史謙登埤守禦晝夜巡邏礮石機弩乘高而
下賊受傷甚眾忽暴風疾雨晝晦賊攻轉急謙語紳士
曰事勢至此吾以身殉計決矣諸君若何學望毅然曰一
命亦人臣敢逃竄乎城陷具衣冠中庭危坐賊入門厲色
叱之罵不絕口賊怒刃刺之縱火焚其舍子登奎奔救於
烈燄中求得其骨以殮葬於古梁山南

縣志

張應弼字二宿廬江人官嘉祥典史致仕崇禎乙亥寇變奉
子正顏正庭正份姪建昌主簿正蒙協力守北門及城陷
冠服坐中庭厲聲罵賊怒斬其臂碎首而死子姪燧

馮其僕耿大耿二見主被難奮力格鬪死之

縣志

談耀祖字華江廬江諸生中萬曆丙子副榜寇薄城下耀祖建議守禦晝夜登陴及城陷具衣冠端坐堞樓罵賊不屈死子之藻等五人同被殺

縣志

許三俊廬江人弟三宅姪鍾穎鍾元鍾淳鍾碧鍾燦俱邑諸生崇禎乙亥守城三俊等協力巡邏賊莫敢近後值淋雨賊潛入木關三俊及弟力禦之手刃二賊賊眾蜂集鍾穎身先格鬪賊以鎗搯其喉斷之猶屹立不仆餘俱力戰死

縣志

柳生金廬江諸生流寇至同生員談華潤等晝夜登城守禦城陷爲賊所執怒罵不屈死

縣志

李陽春字育和廬江人陝西承寧衛經歷弟先春字元初陝西行都司經歷崇禎乙亥流寇至時兄弟俱歸里知縣吳光龍聞其智勇請入城守禦及城潰與賊鬪死

縣志

夏斗光字燦霄廬江人以祖守富征苗功襲廬州衛左所百戶崇禎十六年海寇劉六翼等沿海剽掠調任揚州海防叅將甲申十月率子元勳入海擊賊颶風大作戰艘漂散父子殊死戰從晨至暮矢盡弓折猶格殺驍賊十人援兵不至俱沉水死

縣志

路寬字軻初無爲人少喜兵謀工技擊崇禎閒流寇肆亂州人羣舉寬爲守城長州守請諸上臺授虛銜把總令之統練鄉兵壬午春賊入州界殺掠徧野寬率鄉兵數十人離

城北十五里地名獲冊噉與賊遇奮力殺賊賊勢漸羸圍之所率鄉兵奔潰寬獨力禦敵猶殺賊數人力不能支遂爲賊殺同時有王加惠者素以武勇聞亦被殺

州志

吳之默字師時無爲人叅議廷翰曾孫也少有雋才三副鄉榜晚領歲薦適流賊破州城掠其家默抗言拒之賊不忍傷也值賊隊躡學宮默乃整肅衣冠趨罵之曰賊如何敢犯聖廟獨不畏在天之靈乎賊怒攢梁刺之而死

州志

徐日章無爲人崇禎二年選貢任山東滋陽縣縣丞署縣事崇禎十四年縣被兵破殉城死

州志

楊彪原名雄字旦文合肥人幼喜讀孫吳書通古今成敗事跡居黃得功幕積功至總兵官甲申聞變自刎死

採訪事實

國朝

阮自雄字虎臣無爲人以材武任京口守備康熙十三年隨川督蔡毓榮征吳逆於洞庭陞沅州遊擊蔡甚任之陞副總兵二十年苗人搆亂自雄諭以威福不從率兵進勦賊從篁棘中窺出窺寡不敵力戰死子嘉級蔭千總

州志

王承業廬江人少雄傑有異材任廣西副將吳三桂之亂承業陷陣爭先力戰死晉贈都督廢其子良駿守備

縣志

劉承恩字公亮廬江人年二十從戎哨海有功歷官廣東潮州副將從征吳逆以功陞廣西後營總兵都督僉事竝授長子世勳隨征副將次子紹勳隨征監紀同知大小三十餘戰所向披靡復永淳等處皆有功後以力戰陣亡康熙

三十年開查功績登一統志乾隆二十六年祀昭忠祠

六代孫爲恩騎尉奉其祀

縣志

鍾邦任字任遠舒城人工書畫援例選授湖南沅州府通判
擢貴州大定府知府被議鐫級補四川同知署龍安府知
府時大兵勦金川邦任守八角礮賊圍之急邦任固守不
去遂遇害祀昭忠祠廕子德溥知縣世襲雲騎尉培許國
僕程貴潘升胡岐同時殉死

張至幹字琴六合肥人乾隆甲辰進士授戶部主事善折獄
旋擢員外郎遷郎中出守四川夔州府時逆匪滋擾兵未
集至幹募鄉勇率員弁殲其渠魁復與文武分門扼要隘
晝夜防守逆匪不敢犯從蜀帥勦川匪王三槐等於雲陽

縣臨陣俘獲自軍興兩年夔府屬邑俱遭蹂躪至輪隨機
防禦招徠撫卹甚爲諸帥倚仗以積勞致疾卒年四十一
蔭子坦縣丞